

DOGFENNAU SY'N MYND GYDA'R BIL
Caiff Nodiadau Esboniadol a Memorandwm Esboniadol eu hargraffu ar wahân.

Bil Plant (Diddymu Amddiffyniad Cosb Resymol) (Cymru)

[FEL Y'I DIWYGIWYD AR ÔL CYFNOD 2]

CYNNWYS

- 1 Diddymu amddiffyniad cosb resymol yn y gyfraith gyffredin
- 2 Hybu ymwybyddiaeth y cyhoedd bod adran 1 yn dod i rym
- 3 Adroddiad ar effaith adran 1
- 4 Pŵer i wneud darpariaeth drosiannol etc. drwy reoliadau
- 5 Dod i rym
- 6 Enw byr

Bil Plant (Diddymu Amddiffyniad Cosb Resymol) (Cymru)

[FEL Y'I DIWYGIWYD AR ÔL CYFNOD 2]

Deddf Cynulliad Cenedlaethol Cymru i ddiddymu amddiffyniad cosb resymol yn y gyfraith gyffredin mewn perthynas â rhoi cosb gorfforol i blentyn sy'n digwydd yng Nghymru; ac at ddibenion cysylltiedig.

Gan ei fod wedi ei basio gan Gynulliad Cenedlaethol Cymru ac wedi derbyn cydsyniad Ei Mawrhydi, deddfir fel a ganlyn:

1 Diddymu amddiffyniad cosb resymol yn y gyfraith gyffredin

- (1) Mae amddiffyniad cosb resymol yn y gyfraith gyffredin wedi ei ddiddymu mewn perthynas â rhoi cosb gorfforol i blentyn sy'n digwydd yng Nghymru.
- (2) Yn unol â hynny, ni chaniateir cyfiawnhau rhoi cosb gorfforol i blentyn sy'n digwydd yng Nghymru mewn unrhyw achos sifil neu droseddol ar y sail ei bod yn gyfystyr â chosb resymol.
- (3) Ni chaniateir ychwaith gyfiawnhau rhoi cosb gorfforol i blentyn sy'n digwydd yng Nghymru mewn unrhyw achos sifil neu droseddol ar y sail ei bod yn gyfystyr ag ymddygiad derbyniol at ddibenion unrhyw reol arall yn y gyfraith gyffredin.
- (4) At ddibenion yr adran hon, ystyr "cosb gorfforol" yw unrhyw guro (yn yr ystyr sydd i "battery" yn y gyfraith gyffredin) a wneir fel cosb.
- (5) Yn adran 58 o Ddeddf Plant 2004 (p. 31) (cosb resymol)—
 - yn is-adran (1), ar ôl "battery of a child" mewnosoder "taking place in England",
 - yn is-adran (3), ar ôl "Battery of a child" mewnosoder "taking place in England", ac
 - mae'r pennawd yn newid i "Reasonable punishment: England".

2 Hybu ymwybyddiaeth y cyhoedd bod adran 1 yn dod i rym

Rhaid i Weinidogion Cymru gymryd camau cyn i adran 1 ddod i rym er mwyn hybu ymwybyddiaeth y cyhoedd o'r newidiadau i'r gyfraith sydd i'w gwneud gan yr adran honno.

3 Adroddiad ar effaith adran 1

- (1) Rhaid i Weinidogion Cymru, cyn gynted ag y bo'n ymarferol ar ôl i'r cyfnod adrodd ddod i ben, lunio a chyhoeddi adroddiad ar effaith diddymu, yn rhinwedd adran 1, amddiffyniad cosb resymol.
- (2) Yn is-adran (1), ystyr "cyfnod adrodd" yw'r cyfnod o 5 mlynedd sy'n dechrau â'r diwrnod y daw adran 1 i rym.

4 Pŵer i wneud darpariaeth drosiannol etc. drwy reoliadau

- (1) Caiff rheoliadau a wneir gan Weinidogion Cymru wneud darpariaeth ddarfodol, darpariaeth drosiannol neu ddarpariaeth arbed mewn cysylltiad â dod ag adran 1 i rym.
- (2) Mae'r pŵer i wneud rheoliadau o dan is-adran (1) yn arferadwy drwy offeryn statudol.

5 5 Dod i rym

- (1) Daw'r adran hon, adran 2, adran 3, adran 4 ac adran 6 i rym ar y diwrnod ar ôl y diwrnod y caiff y Ddeddf hon y Cydsyniad Brenhinol.
- (2) Daw adran 1 i rym pan ddaw'r cyfnod o 2 flynedd sy'n dechrau â'r diwrnod ar ôl y diwrnod y caiff y Ddeddf hon y Cydsyniad Brenhinol i ben.

10 6 Enw byr

Enw byr y Ddeddf hon yw Deddf Plant (Diddymu Amddiffyniad Cosb Resymol) (Cymru) 2019.